

續
文
獻
通
考

續文獻通考卷之九十九

皇明進士雲間王圻纂輯

職官考

觀察等使

諸路將官

都總管

都統

都監

巡檢

郡守

刺史

觀察使

遼

南面觀察使司

中京道

高州

利州

上京道

永州

永昌軍

東京道

益州

率州

歸州

皆設觀察使司

以上諸司官曰觀察使曰觀察副使曰觀察判官隸州

學曰博士曰助教

聖宗統和二十九年六月升蔚州利州為觀察使

開泰

元年以蔚州觀察不隸武定軍

金觀察使兼于節度使官制見前

元以其事寄于宣撫而觀察使不設

皇明設按察司即觀察之職詳見後

防禦使

遼太祖神冊四年置東平郡防禦使後增設于東京道

廣州防禦使司 鎮海府防禦使司 冀州防禦使司

衍州安廣軍防禦使司

以上諸司官曰某州防禦使曰某州防禦副使曰某州防禦判官所隸學官曰博士曰助教

金太宗天會六年詔沿邊州置防禦司防禦使一員從四

品掌防捍不虞御制盜賊餘同府尹同知防禦使事一
員正六品掌通判防禦使事判官一員正八品掌簽判
州事專掌通檢推排簿籍知法從九品州教授一員司
軍從九品軍轄兼巡捕使從九品司吏女直一人漢人
管戶五萬以上二十
人州有置
鎮安者職從四品掌修理軍務訓練武藝勸課農桑餘
同防禦

元順帝至正十七年正月准山東分省咨團結義兵每州
添設州判一員每縣添設主簿一員詔有司正官俱兼
防禦使事聽宣慰使司節制

皇明不設防禦使其事統于按察司兵備道而各府州縣

則有巡捕官即古防禦之職詳見後

團練使

遼南面有漢軍都團練使司官曰漢軍都團練使 太祖
神冊二年趙思溫嘗居此職次日漢軍團練副使曰漢
軍團練判官

金不置

元順帝至正十八年九月置奉元延安等處團練安撫勸
農使司於耀州鞏昌等處團練安撫勸農使司於邠州
以行省丞相朶朶行臺大夫完者帖木兒領之各設參
謀一人每道置使二人同知副使各二人檢督六人經
歷知事照磨各一人

皇明

國初團練諸務專設按察司分巡兵備道以統之詳見後
太祖甲辰年十一月初置湖廣道提刑按察使丙午令僉
事周湏等定議按察事宜條具憲綱 洪武元年浙江
江西湖廣三提刑按察使李祥潘勰滕毅克讓律官上
大明令 十年改爲正四品 十三年罷各道按察
司明年復遂定各道按察分司以儒士王存忠等五百
三十一人爲試僉事人按二縣 諭之曰治吏之弊莫
甚於貪墨而庸鄙者次之今天下府州縣官於斯二者
往往有之是以弊政日滋民受其害故 命爾等按治
其地凡官吏賢否軍民利病皆得廉問糾舉 二十年

改按察分司爲四十一道 二十二年復爲正三品
三十年始置雲南按察司 建文中改按察司爲十三
道肅政按察司靖難後復故 永樂五年置交趾按察
司後罷

本司按察使一人副使二人因事添設無定員僉事亦
如之其屬經歷司經歷一人知事一人照磨所照磨一
人檢校一人司獄司司獄一人

按察使掌一省刑名按劾之事糾察官邪擒治貪酷禁
詰強暴平讞刑獄雪理冤枉以振揚風紀副使僉事爲
之貳凡僚屬文武官歲察臧否而上下其考以告撫按
以達於吏兵二部都察院凡省大事暨都布二司參議

焉凡 朝覲慶賀吊祭之禮視布政司副使僉事分巡
提學兵備撫民巡海清軍屯田水利治河驛傳各專事
焉官不備則兼領之凡分巡浙江二道浙東浙西江西
五道南昌湖東湖西九江嶺北福建四道福寧建寧武
平漳南湖廣五道武昌湖南湖北荆南荆西河南四道
大梁河北河南汝南山東三道濟南東兗海右山西四
道冀寧冀南冀北河東陝西六道關內河西關南隴右
西寧關西四川四道川東川西川南川北廣東五道嶺
南嶺東嶺西海南海北廣西四道桂林蒼梧左江右江
雲南四道普安臨沅金滄洱海貴州四道貴寧新鎮安
平思仁經歷典出納文移知事佐之照磨典磨勘卷宗

檢校佐之司獄守獄

成祖永樂中陞按察司僉事位長史上

世宗嘉靖十二年張孚敬攝都察院申明御史糾彈諸司其御史不法亦聽按察司糾彈臺諫不得挾私報復王朝相掌院請如孚敬議上曰此祖制也掌院多事姑息巡按放縱抗違按察司因循畏怯殊非政體令通諭行之勿違

穆宗隆慶元年八月撫臣楊巍以陝西一省八府道路遼濶非一人能周題革督糧驛傳而以分守道兼管糧餉清軍道兼管鹽糧水利十一月加山東布政司左布政使李夢傳一級考以王親不得推陞京職時六年

秩滿撫按官奏其治績故優之 三年十一月吏部議
覆四川撫按嚴清等奏請以四川按察司屯鹽水利茶
法二道合爲一道建昌兵備道改爲兵糧道叙瀘兵備
道改爲下川南兵備道俱兼管分巡上川南分守道當
移駐雅州分守道當移駐嘉定州從之 四年吏部覆
主事郭諫臣奏一兩司方面員缺宜於本省及鄰省就
近遷轉令刻期赴任一府縣官員能者宜行久任之法
其治行卓異者知府歷二三考得陞叅政以上知縣歷
二三考得陞左右給事中以上奉 旨允行 四月從
廣東撫按官議裁革屯鹽倉事併其事于清軍副使南
韶兵備副使仍改設倉事如故 七月始註選河南山

東二省京糧道參議先是總督京糧道有缺降闕防行文書而無註選官歲屬奉表官遞管又遷代不常視如傳舍至是河南撫臣李邦珍請註選專官吏部覆可仍調湖廣參議吳兌于河南及山東督糧左參議馮謙註選管理自是以爲常 五年二月陝西布政司左布政曹金言關中司務煩劇勢難兼攝矧遷轉不一多至曠廢乞於布政司設左參議一員分守關內道其督糧驛傳事務更左參政管理按察司復設僉事一員管理屯田水利其糧斛事務令清軍副使攝理諸州縣佐貳及儒學教官亦乞量復數員吏部覆皆如金言從之 九月從御史吳從憲請復設山東布政司參政一員專理

蘇松常鎮稅糧令浙江按察司僉事兼轄蘇松諸郡縣
水利 六年閏二月兩廣督撫殷正茂奏信地當分言
守巡兵備各官移徙不常故董治靡及百務廢弛宜今
廣東巡視海道駐東莞南頭城分守嶺南道駐省城分
守嶺東道駐惠州府城往來海豐分守嶺南道駐高州
府城分守海北道駐雷州府城廣州兵備兼分巡道駐
新會縣城嶺西兵備兼分巡道駐肇慶府城往來德慶
瀧水南韶兵備分巡道駐韶州府城惠廉兵備分巡道
駐長樂縣城海防兵備分巡潮州道駐潮州府海南兵
備分巡道駐瓊州府城海北兵備分巡道駐廉州府城
監運道調度自後推補各道員缺即於文憑內明駐各

分駐地方使便行事部覆允行

諸路將官

遼北面上京路控制諸奚有諸軍都虞候司官曰都虞候
有奚王府有大惕隱有大國舅司有大常袞司有五院
司有大院司有沓溫司未詳其義其設官皆未詳 遼
陽路諸司控制高麗有東官兵馬都部署司官曰兵馬
都部署曰兵馬副部署有契丹奚漢渤海四軍都指揮
使司所領有契丹奚軍都指揮使司有奚軍都指揮使
司有漢軍都指揮使司有渤海軍都指揮使司有東京
都統軍使司有東京都詳穩司有保州都統軍司有湯
河詳穩司有柵柰司有金吾營屬南有銅川北兵馬都

指揮使司有涇州南兵馬指揮使司有長春路諸司控
制東北諸路有黃龍府兵馬都部署司有黃龍府鐵驪
軍詳穩司有咸州兵馬詳穩所有知咸州路兵馬事同
知紂將有東北路都統軍使司置掌法官道宗大安六
年置 南京諸司並隸元帥府備禦宋國有南京都元
帥府南面兵馬都統管府馬步軍都指揮使侍御控鶴
都指揮使皆屬焉有燕京禁軍詳穩司有南京都統軍
司有牛欄都統領司有拒馬河戍長司聖宗開泰八年
燕京留守蕭敵
烈乞置沿拒馬河宋界東西七
百餘里特置戍長一員巡察有監軍寨統領司有石
門統領司有南皮室軍詳穩司有北皮室軍詳穩司有
猛拽刺詳穩司有管押平州甲馬司 西京諸司控制

西夏有西南面安撫使司官曰西南面安撫使有西南面都招討司官曰西南面招討使有西南邊大詳穩司有西南路詳穩司有西南面五押招討司官曰五押招討大將軍有西南路巡察司官曰西南路巡察將軍有西南面巡檢司官曰西南面巡檢曰西南面同巡檢有西南面搜剌詳穩司有山北路都部署司有知山北道邊境事官有金肅軍都部署司有南王府有北王府有乙室王府有山金司一作山陰司在金山之北西北路諸司控制西北諸國有西北路招討使司官曰知西北路招討使曰監軍有西北路管押詳穩司有西北路總領司有領西北路十二班軍使司有契丹軍詳穩司有吐渾軍詳

穩司有述律軍詳穩司有禁軍詳穩司有奚王府舍利
軍詳穩司有大室韋軍詳穩司有小室韋軍詳穩司有
北王府軍詳穩司有持滿軍詳穩司有郡牧軍詳穩司
有官分軍詳穩司有西北路金吾軍屬南面有西北路
兵馬都部署司有西北路阻卜都部署司有西北路統
軍司有西北路戍長司有西北路禁軍都統司有西北
路巡檢司有西北部鎮撫司兼掌西北部軍民設鎮撫
西北部官有黑水河提轄司 東北路諸司控制東北
諸國有東北路兵馬詳穩司有東北路監軍馬司設東
北路監軍馬使又管押東北路軍馬官有東北路女直
詳穩司有北女直兵馬司 東路諸司有東路兵馬都

總管府設東路兵馬都總管又同知東路兵馬官有東
路都統軍使司有延里等十軍都詳穩司有九水諸夷
安撫使聖宗統和十四年東邊諸軍各置都監 西南
邊諸司有西南面節制諸司節制西南面諸軍事有西
南面都統軍司 西路諸司有山西兵馬都統軍司有
西路招討使司有西邊大詳穩司有西番都軍所有夏
州管内番落使有割城嶺節度使司有割城嶺統軍司
有城西節度使司有城母城節度使司以上設官在諸
都監在諸指揮使司者曰某軍都指揮使曰某軍副指
揮使曰某軍都監在諸統軍使司者曰某軍都統軍使

曰某軍副統軍使曰統軍都監並同其詳穩司節度使司見前

南面有南京兵馬都總管府官曰兵馬都總管曰總領南面邊事曰總領南面軍務曰總南面戍兵官有南京馬步軍都指揮使有侍御控鶴都指揮使司有易州飛狐招安使司有易州飛狐兵馬司有易州飛狐招撫司有西南面招安使司有西南面巡檢使司有五州都總管府有山後五州都總管府有五州制置使司有三州處置使司有霸州處置使司

聖宗統和二十九年耶律瑤質拜西番部詳穩居總管順的下表言先朝舊臣今已年老乞得常侍左右帝曰朕

不使汝久處是任乃命無隸總管事得專奏

史臣曰宋以文勝然遼之邊防猶重于南面直以其地大民聚故耳卒之親仁善鄰桴鼓不鳴幾百餘年此遼所以爲美歟又曰遼境東接高麗南與梁唐晉漢周宋五代爲勍敵北鄰阻卜本不姑大國以十數西制西夏党項吐渾回鶻等強國以百數居四戰之區虎踞其間莫敢與撓制之有猗故耳觀于邊防之官遼祖之雄圖見矣

金諸邊將正將一員正七品掌提控部保將輪番巡守邊境副將一員正八品部將一員正九品輪番巡守邊境隊將正九品 廊延九將 慶陽十將 臨洮十四將

鳳翔十六將 河東三將並依前置

諸紇詳穆一員從五品掌守戍邊堡餘同謀克皇統八年六月設本班左右詳穆定爲從五品麼忽一員從八品掌武詳穆 諸穆里董司穆里董一員從八品分掌部族村寨事 諸禿里禿里一員從七品掌部落詞訟察訪違背等事

元立諸路萬戶府管軍七千戶以上爲上萬戶府達魯花赤一員萬戶一員俱正三品副萬戶一員從三品俱佩虎符五千之上爲中萬戶府三千之上爲下萬戶府其萬戶從三品佩虎符副萬戶則佩金牌中正四品下從四品其官皆世襲有功則陞之每府設經歷知事提控

案牘各一人所屬鎮撫司秩正五品鎮撫二人上中萬戶府俱金牌下萬戶府銀牌上千戶所秩正四品中千戶所秩正五品達魯花赤千戶副千戶俱金牌下千戶所秩從五品副千戶則銀牌彈壓二人在上千戶所從八品中下二所正九品從九品內銓注上百戶所秩從六品下百戶所從七品百戶俱銀牌

河南雍北蒙古軍都萬戶府隸樞密院秩正三品定置都萬戶一員正三品副都萬戶一員從三品經歷一員從七品知事一員提控案牘一員俱從八品屬官鎮撫二員

八撒兒萬戶府隸樞密院萬戶副萬戶經歷知事提控

案牘各一員 千戶所一十翼達魯花赤一十員千戶
十員副千戶一員百戶七十三員彈壓一十員

札忽兒台萬戶府隸樞密院萬戶經歷知事提控案牘
鎮撫各一員 千戶所七翼千戶七員百戶三十八員
彈壓七員 脫烈都萬戶府隸樞密院萬戶副萬戶經
歷知事提控案牘鎮撫各一員 千戶所九翼千戶九
員百戶六十二員彈壓九員 和尚萬戶府隸樞密院
設官同上 千戶所六翼達魯花赤四員千戶六員副
千戶四員百戶四十七員彈壓六員 砲平千戶所一
翼千戶一員百戶六員彈壓六員 哨馬千戶所一翼
達魯花赤一員千戶一員副千戶一員彈壓二員百戶

九員與魯官二員

回回砲手軍匠上萬戶府隸樞密院秩正三品定置達魯花赤一員萬戶副萬戶經歷知事提控案牘各一員鎮撫二員千戶所三翼達魯花赤千戶副千戶各三員百戶三十二員彈壓三員黎兵萬戶府順帝元統二年湖廣行省咨海南僻在極邊南接占城西隣交趾環海四千餘里中盤百洞黎徭雜居宜立萬戶府以鎮之遂依廣西屯田萬戶府例置府設萬戶三人千戶所十三每所領百戶所八水軍萬戶府至正十三年置水軍都萬戶於崑山州十四年立鎮江水軍萬戶府命江浙行省右丞佛家閭領之十五年又置於黃河小清

河 義兵萬戶府至正十四年詔河南淮南兩省並立
義兵萬戶府置南陽鄧州等處毛葫蘆義兵萬戶府募
土人爲軍免其差役令討賊自效十五年又置汴梁等
處義兵萬戶府并忠義忠勤萬戶府於宿州及武安州
置義兵千戶所至正中十年中書奏於廣西平樂等古城
竹山院桑江隘草化鄉刺場嶺湖南道州路武岡路湖
北靖州路等處置義兵千戶所每所置千戶彈壓各一
人百戶十人仍於義兵內推選才勇功能充千戶彈壓
百戶之職首領官都目各一人於本省都吏目選內注
授並從本道帥官節制湖南道州二處千戶所於帥府
分司處設立本司調遣湖北靖州一處從本省標撥鎮

守調遣總定九十六員給降宣勅牌面印信十三年又立義兵千戶水軍千戶所於江西添設兵馬司至正十年十月中書省奏東南千里外妖氛見合立兵馬司四處掌防禦之職遂置大名兵馬司東平兵馬司濟南兵馬司徐州兵馬司每司置都指揮指揮各二員副指揮各四員經歷知事提控案牘各一員至正十三年又命南北兵馬司各分官一員就領通州朔州直沽等處巡捕官兵往來巡邏給分司印一同署事半載一更

皇明

國朝置都指揮使司初爲翼元帥府又改爲行都督府省城或稱都衛都鎮撫司洪武八年改都衛及行都督

府爲都指揮使司 二十年置大寧都指揮使司 二十一年改爲北平行都指揮使司 永樂元年復爲大寧都指揮使司移之保定而棄其地畀朵顏諸戎 五年置交趾都指揮使司 宣德二年棄與安南今都指揮使司十六曰浙江江西福建廣東廣西湖廣河南山東山西陝西四川貴州雲南大寧萬全遼東行都指揮使司五四川陝西湖廣福建山西留守司二曰中都曰興都中都領 皇陵衛即 英陵興都領 顯陵衛外衛及護衛三百七十五守禦屯田群牧千戶所三百七十衛衛司三十二

本司都指揮使二人都指揮同知二人都指揮僉事四

人其屬經歷司經歷一人都事一人斷事一人副斷事
一人吏目一人司獄司司獄一人行都指揮使司亦如
之

都指揮使司掌官軍之政令各率其衛所以謀於五府
而聽於兵部凡都司並派官或得世官歲撫按察其賢
否五歲考選軍政而廢置之使同知僉事常以一人統
司事曰軍政掌印一人練兵一人屯田曰軍政僉書巡
捕軍器漕運京操備禦諸雜務並選充之曰見任管事
否曰帶俸凡備倭守備行都指揮事者不得升牙公座
凡朝廷吉凶之禮視布政司經歷典出納文移都事爲
之貳斷事理刑獄副斷事爲之貳吏目佐之司獄守獄

外衛指揮使一人指揮同知二人指揮僉事
四人衛鎮撫二人陞授改調增置無定員其屬經歷司
經歷一人知事一人有衛學者教授一人訓導一人或
二人有驛遞運所陰陽醫學僧綱道紀司者設官視府
指揮使司掌軍旅防禦之事使同知僉事考選掌管衛
事凡世流襲替優給報都指揮使司達所隸都督府移
兵部每歲藩臬撫按察其賢否五歲一考選軍政廢置
之一人統衛事曰軍政掌印一人練兵一人屯田曰軍
政僉書京操巡捕出哨備禦軍器漕運諸雜務曰見任
管事編諸行伍曰帶俸差操凡撥軍補軍替軍選軍募
軍並統於掌印凡城池時葺浚之度其財力軍十三民

十七鎮撫掌刑獄經歷典出納文移知事佐之軍民指揮使司亦如之千戶所正千戶一人副千戶二人所鎮撫二人百戶十人陞授改調增置無定員

正副千戶選一人掌印一人僉書曰管軍千戶百戶不能皆賢一人常攝數印並選充如衛凡治軍之政必聽於衛衛下千戶所千戶督百戶百戶下總旗小旗率其伍卒以聽所鎮撫無獄事管軍百戶缺則代之守禦千戶所軍民千戶所並如之其屬吏目一人

穆宗隆慶元年正月兵部上勘遼總督劉燾議因言南山爲景陵藩籬關係甚重設有虜警則令昌平總兵與南山參將互相策應從之 二月巡按御史李叔和言

遼東總兵宜以隆冬之時移鎮遼陽以援海州瀋陽米
解回軍廣寧以防土蠻庶東西皆有備兵部覆奏從之
六月兵部覆應天撫臣謝登之奏往者大江南北以
倭寇故募兵增餉萬非得已今地方稍寧宜將水陸軍
兵量爲汰革歲省糧費八萬有奇其常鎮二府各設重
兵無所統轄宜令清軍同知改註海防分地駐守仍兼
理清軍事從之 十月御史郝杰言邇年以來賞每濫
加罰每曲餽威行於文臣而寬於武弁刑及於主帥而
畧於編裨士不用命臨敵奔潰率由於此請必正法以
振國威報可 二年正月甲子給事中孫枝言協理戎
政大臣今未及一載而更代者五人即超世之才不能

於旬月間指揮訓練整齊約束使將士服習宜審擇其人即不能久任亦必假以歲月令得從容展布毋數遷易以增煩擾吏部覆議從之 兵部覆浙江撫按趙孔昭等奏浙江水陸官兵應革者八千人歲減兵餉銀十四萬餘兩止徵銀二十二萬兩有奇以給存留官兵寧波既設海道副使兵備事可以兼攝其紹興兵備可省今寧紹台分守叅議移駐紹興台州兵備僉事兼分巡三府至於寧紹台叅將各防禦信地仍聽總兵官居中調度 上皆從之 五月庚午兵部言山西一鎮舊以大同爲藩籬警備差少自嘉靖壬寅失事之後大同棄牆不守遂與虜隣三關遼隘皆虜必犯之地矣然此鎮

尚在內地虜必糾合諸部乃敢深入故在關南則憂大
舉偏頭一帶逼近虜巢居常則有遊騎出入之苦遇冬
又有套虜乘冰之備故在關外則慮零寇今寧武在忻
代偏計之中既有總兵官駐之東西有警便於策應至
如老營堡遊擊將軍宜移駐馬站河曲守備宜改爲叅
將駐灰溝營水泉營保守宜改爲守備以便防禦其募
軍買馬費請發太僕銀三萬五千兩給之報可 兵部
覆薊遼撫臣譚綸疏請 命戚繼光仍以署都督同知
總理薊昌保定練兵事務該鎮總叅遊等官凡受總督
節制者并受繼光節制本官仍受都督節制府州縣官
不得阻撓違者聽論叅奏處治給以 勅書符驗關防

旗牌 又請遣錦衣衛官二人往浙江募寧紹台溫金衢等處鳥銃手三千人給善器恤其家屬優其資用付杭嘉湖參將胡守仁原任參將李超將之而北無誤防秋至鎮之日人給衣鞋銀一兩日給銀五分費暫出太僕寺以後戶部更議其分立三營事今繼光會譚綸熟計以聞得 旨以繼光原職總理練兵事務秋防已邇所取南兵令巡撫趙孔昭責令守仁超選募督發不得違怠致誤軍機各兵在途錦衣官稽督守仁等嚴行鈐束所過不得騷擾 薊遼總督譚綸條上分立三營事宜請於薊昌十路練兵三萬人列爲三大營以遵化永平遊兵二枝合巡撫標兵一枝爲遵化一營巡撫都御

史劉應節提督之以建昌遊兵一枝合鎮守標兵二枝
爲三屯一營鎮守總兵官郭琥提督之以振武石匣二
營合總督標兵二枝爲密雲一營練兵都督戚繼光提
督之各以兵備監督其遵化三屯二營仍聽戚繼光往
來總理而悉受制於總督不得矛盾異同當春秋兩防
之時各屯要地如永平一區有警則遵化一營禦之三
屯出二哨應之密雲出一哨應之薊州一區有警則三
屯一營禦之遵化出二哨應之密雲出一哨應之密雲
一區有警則密雲一營禦之三屯出二哨應之遵化出
一哨應之兵皆據牆爲戰以拒虜不入爲上功其或一
面失守致虜潰入則令三營之兵併力奮擊務收全捷

又言薊鎮補練主兵將以罷調客兵今行之已踰十年
主兵竟不能充客兵終不可罷何者任之未專而行之
未實也今宜責之臣綸與繼光使得專任其事勿使巡
按巡關御史撓與其間俟三年補練有成然後遣官閱
視補得主兵二枝即罷調客兵一枝補得主兵一萬即
罷調客兵五千責任既專功效自著比之頻年補練迄
今無績不可同日語矣疏入報可已而撫臣劉應節言
薊昌十路惟永平一區最爲單弱宜厚集兵以圖固守
不當以其去京稍遠而秦越視之以臣愚計宜於振武
營改設副總兵一員駐劄密雲統領總督標下各營兵
馬建昌營改設副總兵一員就彼駐劄統領鎮巡標下

上都怯懃口諸色人匠提舉司秩五品各置達魯花赤
提舉同提舉副提舉各一人首領官一人雜造人匠
提舉司秩從四品設官同所異者都目一人典製局秩
從七品大使副使各一人直長二人典設署秩從五
品令丞各四人雜造人匠提舉司秩從四品達魯花
赤一員提舉同提舉副提舉各一員雜造局秩正九
品院長直長管勾各一人

隨路諸色人匠都總管府 中統五年命招集析居放
良還俗僧道等戶習諸色匠藝立管領怯懃口總管府
以司其造作後改爲繕珍司又爲徽儀使司 至治三
年復改都總管府設官品秩與上同多總管一人所轄

官司二十三 上都諸色民匠提舉司秩從五品提舉
同提舉副提舉吏目各一人 金銀器盒局秩從八品
染局秩正八品 雜造局正八品 泥瓦局 鐵局
上都葫蘆局以上俱大使副使各一人 器物局副
使一人 研金局 鞍子局俱大使一人 雲州管納
色提領所提領一員掌納色人戶 大都等路諸色人
匠提舉司設官品秩與上都同少吏目亦各有轄 雙
線局提領一人副使一人受詹事院劄 大小木局受
詹事院劄并領皇宮位下木局 盒鉢局俱大使副使
直長各一人惟盒鉢局受府劄管納色提領一人受府
劄 管銅局筋局鎖兒局粧釘局雕木局 成製提舉

司掌縫製之事設官品秩俱與管領大郊上郊諸色人
匠提舉司同 上都大都詔鼠軟皮等局提領所提領
二人定給從六品印受省劄 大都軟皮局 斜皮局
上都軟皮局俱局使一人副使一人 牛皮局大使
一人 金絲子局掌金絲子匠造作之事 畫油局俱
大使副使直長各一人 畫油局受詹事院劄 毬局多
提領一餘同 材木局掌造作材木大使副使各二人
瑪瑙玉局大使副使各一人直長二人 大都興魯
提領所提領一人掌理人匠詞訟受詹事院劄上都同
上都異樣毛子局 上都毬局大使副使俱各一人
毬局多直長一人俱受詹事院劄 上都斜皮等局大

使副使各一人受詹事院劄 蔚州定安等處山場草木提領所提領一人大使一人副使二人 上都隆興等路雜造鞍子局提領大使各一人直長二人受詹事院劄

真定路冀州雜造局大使副使各一人掌造作之事珠翠局大使副使直長各一人

管領大都等路打捕鷹房膳粉人戶總管府 至元二十九年因招集平瀼散逸人戶立總管府秩正四品置達魯花赤總管首領官各一人隸皇太后位下

管領本投下大都等路怯憐口民匠總管府 中統元年立掌戶口錢帛差發等事置達魯花赤總管各一人

俱受御寶聖旨同知副總管各一人俱受安西王令旨
知事一人隸儲政院所領官司六 織染提舉司掌織
造段疋置提舉一人本府擬人受安西王令旨副提舉
都目各一人俱受安西王割付 管民提領所三大都
路兼奉聖州提領六人曹州二人河間路三人受本府
割 管北提領所二奉聖州提領三人東安州三人受
本府割

管領諸路怯憐口民匠總管府 至元七年招集析居
從良還俗僧道編籍人戶爲怯憐口立總管府以領之
十四年以所隸戶口善造作屬中官 十六年立織
染雜造二局以司造作立提領所以司徭役設官品秩

與前都總管府同所轄官司二十六 各處管民提領
所置提領同提領副提領相副官等官多寡不一 河
間等處九所汴梁等處八所大都等處三所 織染局
雜造局俱大使副使相副官各一人 弘州衣錦院
大使副使直長各一人 豐州毛子局大使副使各一
人 縉山毛子旋局大使一人 徐邳提舉司提舉同
提舉各一人 廣備庫大使副使各一員俱受院劄
汴梁等路管民總管府掌各屯田戶差發子粒隸儲政
院置達魯花赤總管同知府判各一人經歷知事提控
各一人所轄庫一提領所八管佃提領十二
江淮等處財賦都總管府 至元十六年以宋謝太后

福王所獻事產及賈似道地土劉整等田立總管府以治之 大德四年罷命有司掌其賦 天曆二年復立其賦復歸焉設官品秩與前都總管府同所轄官司十一 儲用庫提領大使副使各一人 杭州織染局大使副使相副官各一人 建康黃池二局設官同 揚州等處財賦提舉司達魯花赤提舉同副提舉各一人 提控都目各一人所屬一 安慶等處河泊所提領大使副使各一人 建寧等處財賦提舉司與平江杭州等處二提舉司設官俱與揚州同 建康等處三河河泊所提領大使副使相副官各一人 池州等處河泊所少相副官餘同 平江等處財賦提舉司達魯花赤

提舉同提舉副提舉各一人提控案牘都目各一人
杭州等處財賦提舉司設官同上 陝西等處管領毛
子匠提舉司達魯花赤提舉各一人官皆世襲

功相都總管府至順二年領文宗潛邸扈從臣因設昭
功萬戶都總使司其屬有官相都總管府置達魯花赤
二員副一員都總管一員副二員同知二員所轄都總
管府一總管府一 織染雜造人匠都總管府設官品
秩與上都總管府略同所轄官司十 織染局秩從七
品大使副使各一員 綾錦局秩從七品大使副使各
一員以招收析居放良還俗僧道爲匠教習織造之事
置官以領之 紋錦局秩從七品大使副使各一員領

送納絲銀物料織造段疋 中山局秩從七品大使副
使各一員管領教習織造 真定局秩從七品大使一
員掌織染造作以上三局順帝時賜東宮 弘州尋麻
林納失失二局秩從七品二局各設大使副使一員各
領招收析居放良等戶教習織造 大名織染雜造兩
提舉司秩正六品達魯花赤一員提舉同提舉副提舉
各一員掌大名路民戶內織造人匠一千五百四十有
奇 供用庫秩從九品大使副使各一員受徽政院劄
管領諸路打捕鷹房納綿等戶總管府秩正三品掌
人匠一萬三千有奇歲辦稅糧皮貨採捕野物鷹鷂以
供內府置達魯花赤都總管同知治中府判各一員隸

官相府所轄官司二十五 管領上都等處打捕鷹房
納綿等戶大使副使各一員 管領順德冀寧大德中
山濟南德州益都大同濟寧興和晉寧檀州大寧蘇州
真定趙州保定冀州汴梁二十處打捕鷹房納綿等戶
各提領副提領各一員 管領順州懷慶稻田各提領
所官同上 廣衍庫大使一員 管領滑山炭場所
隨路諸色民匠打捕鷹房都總管府總四幹耳朵位下
戶計民匠造作之事設官品秩與都總管府同多達魯
花赤副總管各一人官吏不入常調凡幹耳朵之事復
置四總管府以分掌之

管領保定等路阿合探馬兒諸色人匠總管掌太祖大

幹耳朵一切事務秩從三品設官同總管府

管領打捕鷹房民匠達魯花赤總管府掌二皇后幹耳朵位下歲賜財物造作等事秩從四品設官同

管領隨路諸色民匠打捕鷹房等戶總管府掌太祖大幹耳朵四季行營一切事務品秩設官俱同上

管領隨路打捕鷹房諸色民匠怯憐口總管府掌太祖四皇后位下四季行營并歲賜造作之事秩從三品設官同 隨路打捕鷹房諸色匠總管府掌北安王位下歲賜錢糧之事秩正四品設官同

尚供總管府掌守護東涼亭行宮及遊獵供需之事秩正三品設官同上所轄三 香河等處巡檢司巡檢一

人 景運倉提點一人從五品大使一員正六品副使
一員正七品至元二十一年置 法物庫使副各一人
至元二十九年置

雲需總管府掌守護罕察腦兒行官及行管供辦之事
秩正三品設官同

大都路總管府秩從三品達魯花赤二員都總管一員
副達魯花赤二員同知二員治中二員判官二員推官
二員經歷二員知事二員提控案牘四員照磨兼管勾
一員初爲燕京路總管大興府 中統五年稱中都路
至元九年改號大都 二十一年始專置大都路總
管府秩從三品置都達魯花赤都總管等官 二十七

年陞爲都總管府進秩正三品領府一州十有一凡本府官吏惟達魯花赤一員及總管推官專治路政其餘皆分任供需之事故又號供需府其屬爲兵馬都指揮使司

管領諸路打捕鷹房總管府秩正三品達魯花赤一員總管一員副達魯花赤一員同知一員副總管一員經歷知事各一員宛平縣秩正六品達魯花赤尹各一員丞主簿各三員尉一員典史三員至元十一年置治大都麗正門以西大興縣秩正六品達魯花赤尹丞各一員主簿二員尉一員典史三員至元十一年置治大都麗正門以東東關廂巡檢司秩從九品巡檢

三員堂巡捕盜賊奸之事 西北南關廂兩巡檢司
設置並同上

管領隨路打捕鷹房民匠總管府隸兵部 管領本投
下六都等路打捕鷹房諸色人匠都總管府隸兵部

隨路諸色民匠打捕鷹房等戶都總管府隸兵部品秩
掌詳見本部下同 管領本位下打捕鷹房民匠等

戶都總管府隸兵部 諸色人匠總管府隸工部 諸

司局人匠總管府隸工部 諸路雜造總管府隸工部

茶迭兒局總管府隸工部 大都人匠總管府隸工

部 隨路諸色民匠都總管府隸工部 永平屯田總

管府隸大司農司 淮東淮西屯田打捕總管府隸宣

徽院 隆禧會福崇粹壽福四總管府俱隸大禧宗裡
院 諸路金玉人匠總管府隸將作院 行諸路金玉
人匠總管府隸將作院 異樣局總管府隸將作院
大都等路民匠總管府隸將作院

管領大都等路打捕民匠等戶總管府領提舉司十有
一提領所二十五隸中尚監

管領諸路打捕鷹房民匠等戶總管府領提舉司四提
領所十一隸中官位下二府俱掌錢糧造作之事品秩
設官俱與前總管府同

江浙等處財賦都總管府品秩設官俱同但總管曰都
總管掌江南沒入貲產課其所賦以供內儲領提舉司

三庫一局一

管領大名等處種田諸色戶總管府

管領大都河間等格打捕鷹房總管府二府皆正五品
置總管副總管都目各一人

管領本位下怯憐口隨路諸色民匠打捕鷹房都總管
府品秩設官與江浙同掌怯憐口二萬九千戶田一萬
五千餘頃出賦以備供奉營繕之事

皇明兵民錢穀俱統於布按都司及府州縣以上總管等
官俱不設

都副鈐轄

遼北面控制西北夷者有黑水河提轄司蓋即鈐轄之職

見前

金都統之外設總領提控見前 諸防刺州軍轄一員掌

同都軍兼巡捕仍與司候同管城壁 諸府州兵馬鈐

轄一員掌巡捕盜賊若有盜則總押隨處巡尉併力擒

捕司吏二人京兆咸平濟南鳳翔萊密懿澤州皆依此置惟京兆咸平府置兵馬都鈐轄餘並省

元無考

皇明不設止于府州縣下置巡捕官一員詳見後

都統

遼北面行樞密院下有都統所其官曰監軍曰行軍諸部

曰監戰曰行軍都統曰行軍副都統曰行軍都監其分

列有行軍都押司官曰都押曰副押有行軍都部署司

有左翼軍都統所有右翼軍都統所有中軍都統所有
御營都統所其遠探軍曰小校曰搜刺其候騎曰偵候
曰候人曰搜刺有東征都統所亦號東面行軍都統所
又號東路行軍都統所有東征統軍司有東征先鋒使
司蓋皆爲高麗而設也有南征都統所亦號南面行軍
都統所有南征統軍司有南面行營總管府有南面行
營都部署司有河南道行軍都統所蓋皆爲宋而設也
外此又有北道行軍都統所有東北面行軍都統所有
西北面行軍都統所有西南面行軍都統所其設官皆
同史臣稱遼行軍官樞密都統部署之司上下相維先
鋒兩翼嚴重中軍于遠探偵候爲尤謹臨陣重于監

戰司存有常秩然整暇所以爲制勝之道也

金收國元年置南路都統司以討張曷 天輔五年襲遼
主始有內外諸軍都統之名時以奚未平又置奚路都
統司後改爲六部路都統司以遥輦九營爲九猛安隸
焉與上京及泰州凡六處置每司統五六萬人又以渤海
軍爲八猛安凡猛安之上置軍帥軍帥之上置萬戶
萬戶之上置都統天會元年以襲遼主所立西南都統
府爲西北西南兩路都統府後伐宋更爲元帥府即此
也十年改南京都統司爲東南都統司治東京以鎮高
高麗後又置統軍司于大名府 天德二年罷大名統
軍司而置統軍司于河南山西陝西三路以元帥府都

監監軍爲使分統天下之兵又改烏古迪烈路統軍府
爲招討司以安連路統軍司爲總管府正隆未復陞陝
西統軍司爲都統府又設三道都統制府及左右領軍
大都督將三十二總管以伐宋 大定五年復罷府降
爲統軍司元光時招義兵以四萬戶爲一副統兩副統
爲一都統 統軍司河南山東陝西都使一員正三品督領軍
馬鎮攝封陞分管衛視察奸副統軍一員正四品判官
一員從五品紀綱庶務簽判司事大定九年知事一員從
七品知法二員從八品女直漢人各一書吏十三人
一人掌行署文牘上名監印守當官四人譯書四人通事
一人抄事二人公使五人河南休此置山東不設判官
府知法以益都法義之

東北路者初置烏古迪烈部後置于泰州泰和以去邊
尚三百宗浩乃命分司于金山西北路者置于應州
西南路者置于桓州皆以重臣知兵者爲使
元以其事分于元帥大都督而都統之名不立
皇明不設

兵馬都監

遼金諸司府有都監之職皆監本司府軍旅事非若宋之
兵馬都監分掌各路禁旅屯戍邊防訓練之政令以肅
清所部也故皆置之監軍而此不列

元有大都路兵馬都指揮使司凡二秩正四品掌京城盜
賊奸僞捕鞠之事都指揮使二員副指揮使五員知事

一員提控案牘一員 王元九年改千戶所爲兵馬司
隸大都路而刑部尚書一員提調司事 二十九年置
都指揮使司二分于城之南北

皇明南北二京俱設五城兵馬司以掌緝捕房號等事不
設都監

巡檢

遼北面控制西夏者有西南路巡察司西南面巡檢司控
備西北諸國者有西北路巡檢司宣制 南面邊防有

巡檢使司保寧中耶律合住嘗授巡檢使

金中都東北都巡檢使一員正七品通州置司分管大興

郭陰昌平通順薊盈州界盜賊事

司吏一人掌行署文書馬軍十五人千武

衛馬軍內選少壯
熟閑弓馬人充

西南都巡檢一員正七品良鄉縣

置司分管良鄉宛平安次永清縣并涿易州界盜賊事

諸州都巡檢使各一員正七品副都巡檢使各一員正

八品

宿泗唐鄧蔡毫陳潁德華河隴秦等州并西北路皆依此置餘不加使字

散巡檢正

九品內泗州以勾管排岸兼之皆設副巡檢爲之佐

地險

要處置司唐鄧宿泗潁壽蔡等州及綠邊二十五處置大定二十二年廣寧府大斧山置巡檢司明昌五年七

月并蔡州劉

擇付置巡檢又有譏察之職所掌事畧與巡檢相似

所置有數處詳見各關津類 南邊後置譏察使從七

品副使從八品陝西者置于秦州河南者置于唐鄧息

壽泗五州 沿淮譏察使從五品

元置巡檢司秩從九品掌巡捕盜賊姦究之事俱見各司

皇明在內不設在外府州縣地方關津要害處所各設巡檢司巡檢一員俱從九品率領徭編弓兵或二十人或三十人專主巡緝盤詰諸務

郡守

宋理宗時詔免諸州守臣上殿奏事右丞相葉夏四官祖宗謹重牧守之計將赴官必令奏事蓋欲察其人品及面諭以廉律已愛育百姓甚至郡延見吏民宣上德意庶幾永無負臨遣之心今不遠數千里而來咫尺天顏而不得見非立法之本意

遼南面黃龍府官曰知黃龍府事曰同知黃龍府事曰同知黃龍府通判與中府設官同

金諸府非兼總管府事者尹一員正三品同知一員正四品少尹一員正五品府判一員從六品掌紀綱文務分判吏戶禮案事專管通檢推排簿籍推官一員正七品掌同府判兵刑工案事知法一員

元世祖至元初置諸路總管府二十年定十萬戶之上者爲上路十萬戶之下者爲下路當衝要者雖不及十萬戶亦爲上路上路秩正三品達魯花赤一人總管一人兼管勸農事江北則兼諸軍與魯同知治中判官各一人下路秩從三品不置治中而同知如治中之秩二十三年又置推官二人專治刑獄下路一人經歷知事或一人或二人照磨兼承發架閣一人司吏無定制隨事

煩簡以爲多寡又散府秩正四品達魯花赤一人知府
或府尹一人領勸農興魯諸路同同知判官推官知事
提控案牘各一人所在有隸諸路及宣慰司行省者有
直隸省部者有統州縣者有不統縣者其制各有差等
所屬附見 司獄司司獄一人丞一人 平準行用庫
提領大使副使各一人 織染局局使一人副使一人
府倉大使一人副使一人 惠民藥局提領一人
稅務提領一人大使副使各一人

草木子曰元路州縣各立長官曰達魯花赤掌印信以
總一府一縣之治判署則用正官在府則總管在縣則
縣尹達魯花猶華言衙也赤壓口榛子也亦猶古言總

轄之比

皇明

國初罷各路總管府於兩京置直隸府各省分置諸府洪武六年定爲三等賦二十萬石上爲上府從三品二十萬下中府正四品十萬下下府從四品已而並爲正四品

知府一人同知一人通判一人推官一人因事添設同知推官或二人通判至五人其屬經歷司經歷一人知事一人照磨所照磨一人檢校一人司獄司司獄一人所屬衙門儒學教授一人訓導四人倉稅課司分司雜造織染局各大使一人副使一人陰陽學正術一人醫

學正科一人僧綱司都綱一人副都綱一人道紀司都紀一人副都紀一人有巡檢司批驗茶鹽引所水馬驛通運所河泊所草場等司巡檢一人批驗所大使一人驛驛丞一人通運所大使一人河泊所所官一人草場大使一人

知府掌教養郡民之事同知通判推官爲之貳賓興科貢均平賦役崇慎祀典禁誥奸頑表異良善訊聽刑獄審達冤滯存恤困窮糾察吏治上下其考以告於撫按藩臬上於吏部務知百姓之疾苦若籍帳軍匠轉驛馬牧倉庫盜賊河渠溝防道路之事雖有專官皆知府領之而總督焉凡朝覲慶賀弔祭直隸府得直達省府親

布政司凡 詔赦例令勘劄至謹受以下於屬凡屬之
政皆受約束於府府劑量重輕爲之出令大者白於撫
按及藩臬議允而行之同知清軍匠或兼巡捕通判管
糧緝盜治農修河牧馬推官理刑名分職任事經歷典
出納文移知事佐之照磨典磨勘卷宗檢校佐之司獄
典獄教授掌教生徒訓導佐之凡生徒廩膳增廣各四
十人附學無數凡學政違卽碑提學憲臣申飭之責提
調於府教授訓導必謹受之凡學官視鄉舉人爲殿最
凡郡禮儀事學官司之稅課司典稅凡商僧屠市皆有
常征以時權之而輸直於府凡民間買田宅操券契出
直百之三請印而藏之庫守藏凡縣歲輸及雜賦若諸

贖金悉登籍倉典粟凡民賦軍屯之入及諸司贖穀俸
祿糧米並收支焉織造局典織造凡錢幣有常數絲與
練染之費並給於府會其數而籍之幣成覆於府而納
於內帑若宣索非局所長業者府市之以供上巡檢控
嬰害譏察異常姦宄竊發則應時捕擎以聽巡捕之令
三年計其捕僞印強竊盜逃軍囚以爲上下考批驗茶
鹽引所典茶鹽引由稽其奸冒而慎防之驛遞典傳郵
迎送之事凡舟車夫馬庫廩庖饌稠帳皆取給於丁田
受於府而藉其出入之數河泊所典魚課草場受牧馬
芻粟陰陽學司占候天文晷漏日月食則供救事醫學
司方藥診療人民僧綱領僧人道紀領道士凡救日月

食請兩請齋祀屬壇綱紀則謹率其徒施其教事凡春
秋奏樂於先師則以道充樂舞生

教授

理宗慶曆四年詔諸路州軍監各立學學生二百人以上
許更立縣學又置教授以經術衍義訓導諸生

遼南面黃龍府學官曰博士曰助教興中府學設官同縣
亦設學有博士助教

金諸府並設教授一貢大興府設女直教授一貢東京北
京上京河東東西路山東東西路大名咸平臨漢陝西
統軍司西南招討司西北路招討司婆速路曷懶路速
頻蒲與胡里改隆州泰州蓋州並同外又設醫院有醫

正一人醫工八人

元諸路儒學蒙古學醫學陰陽學俱設教授正八品員數
多寡不同儒學又增置學正學錄各一人訓導六人有
學吏一人蒙古學又增置必闡赤各縣儒學則置教諭
又各處書院置山長一人

府錄事叅軍

遼南官諸州有錄事軍位次同知州事之下見前

金諸府節度錄事司錄事一員正八品判官一員正九品
掌同院

元置錄事司秩正八品凡路府所治置一司以掌城中戶
民之事 中統二年詔驗民戶定爲元數二千戶以上

設錄事司候判官各一員二千戶以下省判官不置
至元二十年置達魯花赤一員省司候以判官兼捕盜
之事典史一員若城市民少則不置司隸之倚郭縣在
兩京則爲警巡院獨杭州置四司後省爲左右兩司

督郵

遼金不設

元驛傳之制有府寺驛

驛和驛兵部驛驛站官

有符節

圖碑聖旨札子

有次

舍有供頓

馬車牛驢狗驛驛

傳之在漢地者兵部領之在北地

者蒞以通政院郡邑之都會道路之衝要則設脫脫禾

孫之官以檢使客防奸非驛各有主者以典其事此其

府寺使者銜密命以出或急遽不能待有司文移則典

瑞院徑自御前出金字圓符付之即佩以行次有銀字者以常事遣則省部給御寶聖旨水行者給船劄此其符節驛中有堂有室有庖湍兩驛相距道修則道半別置官舍以憩號邀驛此其次舍使者宿驛中則給米泔酒各一升麵泔肉各一斤曰全餐不宿而過者給半餐冬之炭夏之冰雨之製備焉僕從予米他不給陸行馬徵者或給驢閭廣馬少或代以牛水行舟山行轎僊者給卧轎綱運以車馬直險則丁夫負荷以過遼海則以大曳小輿載使者行冰上此其供頓其馬舟車之數視官崇卑事大小爲多寡民之役驛中者復其地四頃不輸租與兵士同然出馬供使客馬死輒買補之有正焉

副焉或久而貧不能爲役別取可者代之使者不得在道行杖節人擇善馬囊橐重不勝載非整急而疾馳馬致斃者皆有罪此又其事之大槩也進奏之邸在京師者曰會同館而綱運則號陸運提舉司云

急遞鋪

金章宗泰和六年十二月初設都控急遞鋪官

元制轉送朝廷及方面郡邑文書往來十里或十五里二十五里設一急遞鋪十鋪設一郵長鋪設卒五人文書至則紀於曆視早晏標至時於封因以絹囊貯而版夾之又裹以小漆絹卒腰革帶帶懸鈴手鎗挾檢陳賁文書以行夜則持火炬焉道狹車馬者負荷者聞鈴則遙

避諸旁夜亦以驚虎狼前鋪聞之則出以俟其至囊版以護文書不破碎不礙積摺小漆絹襪極以禦雨雪不濡濕鎗以脩不虞定制一晝夜走四百里郵長治其稽滯者郡邑官役督察加詳焉而勤惰有賞罰京師則設總急遞鋪提領所秩九品銅印官三員又有號牌鎖匣印帖長引隔眼之法可謂密矣

刺史

遼南面諸州各有州刺史與古之州牧刺史大小頗異

上京道五州

烏

降聖

維

防

招

東京道三十七州

穆 賀 盧 鐵 崇 耀 嬪

遼西 康 宗 海北 岩 集 棋

遂 韓 銀 安遠 威 雍 胡

渤 郢 銅 率賓 洑 定理 鐵利

清 麓 荆 媵 順化 連 速

安 吉

中京道十三州

恩 惠 榆 澤 北安 潭 松山

安德 黔 嚴 隰 遷 閏

南京道八州

順 檀 泳 易 薊 景 營

灤

西京道八州

弘德 寧遠 歸化 可汗 儒武

東勝

以上皆設官曰刺史曰同知州事曰錄事叅軍州學官
曰博士助教

聖宗統和八年四月肅州刺史李壽英有惠政民請留從
之

道宗清寧四年正月知易州事耶律頗得秩滿民請留從
之

金州名不同設防禦者謂之防禦州職具防禦使下設刺

史者謂之刺史州其官刺史一員正五品掌同府尹兼
治州事同知一員正七品通判州事判官一員從八品
簽判州事專掌通檢推排簿籍司軍從九品知法一員
軍轄兼巡捕使司候司司候一員正九品司判一員從
九品

世宗大定七年以蠡州同知移刺延壽在官汚濫詢其出
身乃正隆時鷹房孑勅自今鷹房厨人之類不得委臨
民職任

元以州次于郡刺史不設其官仍詳于州下 中統五年
併立州縣未有等差 至元三年定一萬五千戶之上
者爲上州六千戶之上者爲中州六千戶之下者爲下

州江南既平 二十年又定其地五萬戶之上者爲上
州三萬戶之上者爲中州不及三萬戶者爲下州於是
陞縣爲州者四十有四縣戶雖多附路府者不改上州
達魯花赤州尹秩從四品同知秩正六品判官秩正七
品中州達魯花赤知州並正五品同知從六品判官從
七品下州達魯花赤知州並從五品同知正七品判官
正八品兼捕盜之事叅佐官上州知州提控案牘各一
人中州吏目提控案牘各一人下州吏目一人或二人
邊遠之地有諸軍各統屬縣其秩如下州其設官置
吏亦如之 又諸蠻夷長官司于西南夷諸溪洞各置
秩如下州達魯花赤長官副長官叅用土人爲之附見

皇明不設州刺史而州次于府各置官屬

州官凡直隸畿府各省及屬府者並從五品佐貳首領品有差

知州一人同知一人判官一人里不及三十而無屬縣者裁同知判官有屬縣者裁同知因事添設專設無定貲其屬吏目一人所屬衙門儒學學正一人訓導三人陰陽學典術一人醫學典科一人僧正司僧正一人道正司道正一人稅課局大使一人副使一人有巡檢司驛遞關壩批驗所河泊所倉草場者設官如府吏

知州掌教養州民之事同知判官爲之貳凡諸州務上視府下視縣以月計上府以歲計上省以三歲之計上

吏部同知清軍匠或兼巡捕判官督糧管馬捕盜治農
管河分職任事而領於知州吏目典出納文移或分領
州事儒學生徒廩膳增廣各三十人附學無數學正訓
導職如府學間官主啓閉黃洩壩官典守隄防各率其
役以通舟楫之利諸所屬衙門如府者職亦如之